

Cu cambio den Centro di Oranjestad

Ta bay construi tres garashi pa staciona auto

ORANJESTAD – Poco poco comunidad di Aruba por mira mas e forma di e proyectonan cu Gabinete Mike Eman tin pa Centro di Ciudad. Proyectonan cu ta forma parti di e plan integral pa mehora productu Aruba. Un di e tantisimo proyectonan cu tin ta renobacion di centro di Oranjestad.

Den e proyecto aki ta encera incorporacion di un tram (streetcar) cu ta core for di haf te na final di centro di Oranjestad y bolbe bek. Tur esaki den ocho minuut. E tram aki no solamente por wordo uza door di e bishitantenan, pero tambe door di localnan.

Minister Benny Sevinger, encarga cu tur e proyectonan di renobacion, entre otro esun di Centro di Ciudad, a bisa di ta consciente di e preocupacion cu ta existi pa loke ta e parkeamento den e centro. Den e proyecto di renobacion di Centro a tene debito cuenta cu e problema of escasez cu lo bay tin pa parkeo.

E mandatario ta splica cu tin tres proyecto di Parkeer Garage. Uno lo bini na e parada grandi di Arubus; e di dos ta unda antes tabata Tivoli. Esaki ta un proyecto di FCCA y probablemente ta esun cu ta bay

keda cla prome tambe, pasobra ta trahando riba e mapa caba. Ta spera di por cuminsa cu e construcion e aña'ki ainda. E di tres ta proyecta na final di caya grandi. Pero pa esaki ta den negociacion ainda pa compra di e tereno en cuestion.

Ademas di e Parkeer Garage, ta bay tin parkeer-meters den y rond di centro y ta tin lugar di parkeo cu ta tur rond di centro. Den cuadro di e plan aki, e tram ta bay hunga un rol importante, principalmente pa e garashi cu lo wordo construi banda di Arubus.

Aki ta programa un area cu tin mas cu 1000 espacio pa para auto. Esaki ta nifica cu personanan cu ta traha of bay haci respondi den centro por staciona nan auto y haci uzo di e tram pa yega centro, vice versa.

Minister Sevinger a bisa cu Gobierno ta papia cu doñonan di trabou pa encurasha nan trahadonan staciona nan autonan na garashi y den 8 minuut nan por ta den centro caba, enbes di keda core rond, gasta gasolin y tempo, pa busca un luga pa staciona mas cerca. Y di e manera aki e areanan cerca di centro ta keda pa e clientenan mes. E garashi tin proteccion pa e autonan. □

